

ՆԱՆԱ ԲԱԳՐԱՏՅԱՆ

ԳՐԱԿԱՆՈՒԹՅԱՆ ԳՈՐԾԻՉՆԵՐԸ ՀՐԱՆՏ
ՍԱԹԵՎՈՍՅԱՆԻ ԳՆԱՀԱՏՄԱՍԲ

Հրանտ Մաթևոսյանը շատ ուշադիր և բարյացակամ անձնավորություն էր իր շրջապատի տաղանդավոր անհատների հանդեպ, նրանց նկատելու և գնահատելու ընդգծված բնավորություն ուներ և առիթը եկած պահին կամ նույնիսկ՝ առանց երևացող առիթի, չի զլացել արտահայտվել նրանց մասին: Հրապարակախոսության այս ճյուղը որպես կանոն դասակարգվում է «գրախոսություն» բնութագրականի տակ¹: ՈՒսումնասիրելով Մաթևոսյանի ժառանգության այս հատվածը, նկատվում է, որ, այնուամենայնիվ, այն ժանրային ստույգ դասակարգման սխալ կլիներ ենթարկել: Մաթևոսյանը իրականության տաղանդավոր նկարիչ էր, և այս անդրադարձները իր շրջապատի գործիչներին այդ ընդհանուր բնանկարի մի հատվածն են կազմում: Ամփստելի է այս անդրադարձների ծանաչողական արժեքը:

Հրանտ Մաթևոսյանն իր հրապարակախոսությունը սկսեց, կարելի է ասել, հենց այս ժանրով: Նրա առաջին տասը հեղինակային հոդվածներից ութը նվիրված են մեր գործիչներին, գրողներին, արվեստագետներին: Եվ հետագայում երբեք չմոռացավ այն, դա պայմանավորված էր իր կերտվածքով:

Հայտնի է, որ Հրանտ Մաթևոսյանը բացառիկ համակրանք է դրսևորել սփյուռքահայ անկրկնելի մի գրողի՝ *Հակոբ Մնձուրու* նկատմամբ: Մաթևոսյանին կարելի է համարել որոշ առումով նույնիսկ Մնձուրու հայտնագործողը մեզ համար. այնպիսի ջանասիրությամբ և հետևողականությամբ էր նա գտնում իրեն ժամանակակից, բայց մի շարք պատճառներով ժամանակի ընթերցողին դժվար մատչելի նրա ստեղծագործության մեկիկ-մեկիկ հավաքված պատահիկները և պատրաստում, հանձնում, պարտադրում տպագրության: Վահագն Դավթյանի նման տեղեկացված անձնավորությունը մի գրույցում հիշում է, որ Մաթևոսյանն էր առաջին անգամ ծանոթացրել Մնձուրու մի պատմվածքի հետ. «... այնուհետև նա մեզ համար, ինչպես ասում են, փնտրված հեղինակ»²:

¹ Տես, օրինակ, Жанры советской газеты, М, 1972,

² Հեռացող աշխարհի առաքյալը: Գրական թերթ, 12 նոյեմբերի, 1976:

Հրանտ Մաթևոսյանը Մեծուրուն գյուղագիր չէր անվանում, այլ՝ կենցաղագիր: Նա գտնում էր, որ ընդամենը միայն Մեծուրուն ուսումնասիրելով, ազգագրագետները կարող են չափազանց թանկարժեք վկայություններ ձեռք բերել այս կորած գյուղաշխարհի մասին՝ որոնք այլ աղբյուրներից հնարավոր չէ այլևս հայթայթել: Նրան անվանում է «Անհետացող աշխարհի առաքյալ ապագայի համար»³:

Մաթևոսյանն առիթը բաց չի թողնում նկարագրելու Մեծուրուն աշխարհը, նկարագրում է նրա ու իր բառերը իրար խառնած, նրա պատկերները՝ որպես իրենք: Հպարտանում է Մեծուրուն հետ նրա (իր) ժողովրդով մի յուրահատուկ հպարտությամբ, կարոտալի ու ափսոսող հպարտությամբ՝ փորձիր հպարտանալ չեղածով, եղած-զնացածով, անվերադառնալիով՝ սա Մաթևոսյանի ու Մեծուրուն հպարտությունը կլինի: Ջարմանալի է «արևելահայ» Մաթևոսյանը ինչպես է դետալ առ դետալ հասկանում մինչև ուղնուծուծը արևմտահայ Մեծուրուն այդպիսի կենցաղային մանրամասնությամբ: Թեպետ ակնհայտ է գյուղական թեմայի ձգողականությունը, սակայն այս երկու բնաշխարհիկ գրողներին այդքան հարազատորեն կապող գերագույն ուժը հումանիզմն է, ընդհանուր սերը ամենայն մարդկայինի նկատմամբ: Եվ մաքուր մարդու հետ՝ մաքուր բնության աստվածացումը: Գրականագետները հետո պիտի ուսումնասիրեն Մաթևոսյանի պանթեիզմը, իսկ Մաթևոսյանն ի սկզբանե վերլուծում էր պանթեիզմի դրսևորումները Մեծուրուն մոտ, նրա «կարոտալից բնապաշտությունը», «մի մեծ բնապաշտություն, որ ժամանակի հետ ավելի կխորանա ու իրական ծանրակշիռ արժեք կտա գրողի «դաշտանկարներուն»:

Եվ մի հանգամանք ևս: Մաթևոսյանին ոմանք հակում ունեն «մեղադրելու» եղեռնի թեմայից խուսափելու համար, դրանով հակադրելով, ասենք, Մուշեղ Գալշոյանին: Որ սա ծայրահեղ մակերեսային և անարդար մոտեցում է, առանձին առիթներով ապացուցել են մեր գրականագետները: Ոչ միայն իրական հումանիստ Մաթևոսյանը չէր կարող չըջանցել մարդկության նկատմամբ այդ մեծագույն հանցագործությունը, այլև փաստերը ցույց են տալիս, որ իր ստեղծագործության ամենասկզբից իսկ նրա հոգում որպես խոր վերք նստած է այդ գաղափարը: Մեծուրին ինքը եղեռնի ամենաանմիջական ժառանգորդը լինելով հանդերձ, իր գրական կերտվածքի օրինաչափություններից ելնելով, եղեռնի ուղղակի տեսարաններին չի նվիրվում (դա լավագույն օրինակն է հասկանալու Մաթևոսյանի այն պնդումները, թե թեմաներ կան, որ ենթակա չեն զեղարվեստական արտացոլման, կամ զոհն՝ բոլոր հեղինակները չեն, որ կարող են դրանց անդրադառնալ զեղարվեստական ստեղծագործության մեջ): Սիա

³ Акоп Мндзур, Литературная Армения, # 6, 1984, стр. 38.

նույնիսկ Մնծուրու մեղմ արվեստի մեջ Մաթևոսյանը խորությամբ տեսնում է մարդկության դեմ այդ մեծագույն մեղանշումի թողած հետքը, և դեռևս 60-ականներին, Մնծուրու առիթով դիպուկ շեշտադրությամբ և ատելությամբ նկարագրել է այդ չարիքի դեմքը. «Սելավի պես ողողեց ու քանդեց հարավային արևով ու Վարուժանի բնությամբ լուսավոր *մեր* երկիրը, և Մնծուրու հոգով մեկ նվալ սկսեց կորած կապույտ աշխարհի կարոտը ... դեռ միայն աղքատ ու կարծես դրական, դեռ միայն պարարտ ոճրահող ... այդ ալարկոտ, փնթի, չմտածող ու ջարդող խուժանի բորոտ զանգվածը»⁴։ Բայց այս գայրույթը երկու գրողների գեղարվեստական գործերում այսպես մերկապարանոց չէր ներկայանում։ Եղեռնի արյունից վախենում էր Մաթևոսյանը։ Այդպես էր և Մնծուրին՝ դե փորձիր մեղադրել։ Եվ դա միայն եղեռնին չի վերաբերում։ «Մնծուրին կարող էր «ողբերգություն», «դրամա» դնել իր պատմվածքների մեջ, բայց նա այդ չի արել, չի արել, մեր կարծիքով, նյութի նկատմամբ խոր հարգանքի պատճառով կամ շնորհիվ»։ «... Նուրբ գեղագետի նրա խիղճը արգելում է պայթուցիկ ողբերգություն դնել այնտեղ, ուր այդ ողբերգությունը, որպես օտար մարմին, չէր հանդուրժիկ»։ «Դրամա, ողբերգություն՝ ներքին փլուզումներ, իհարկե, կան Մնծուրու բոլոր պատմվածքներում, ինչպես որ դրանք անպայման կան կյանքում, բայց այդ զարմանալի արծակագիրը դեն է նետել, մերժել է դրամա-ողբերգություն դասական և դասականացնող *գրականական* ծիրանին»⁵։ Շատ նման է իրեն Մաթևոսյանին։ Դրա համար էլ այդքան հարազատ էր։

Մնծուրուն Մաթևոսյանը երբեք որպես գրախոս չմոտեցավ, և ոչ էլ որպես գրական քննադատ։ Գրչեղբայր հայկական բառը այստեղ է որ իր ամբողջ խորությամբ և ստանում, և այն էլ չի բավականացնում, քանի որ դա ընդհանուր, մարդկային, համամարդկային եղբայրություն է, որ կարող են ունենալ հատկապես արվեստագետները։ Մաթևոսյանը մեկ առ մեկ հաշվել է Մնծուրու բոլոր 200-ի չափ պատմվածքները։ Եվ հիշում է բոլորի դետալները։ Մաթևոսյանն ասում է, որ որոշ պատմվածքներ, Մնծուրին եթե գրած չլիներ ինքն էր գրելու։⁶

Զրանտ Մաթևոսյանի ամենաարժանավոր ժամանակակիցներից էր *Մուշեղ Գալշոյանը*։ Այս երկու գրողները կոչված էին ներկայացնելու հայ ժամանակակից արձակի երկու հզոր ճյուղ։ Մաթևոսյանը պետք է շարունակեր բակունցյան ավանդույթները, Գալշոյանը եկել էր լրացնելու Դաշտենցին։ Մինչև այսօր էլ մենք Մուշեղի գեղարվեստական համակարգը հակադրում ենք Մաթևոսյանին։ Նրանք իսկապես հակադիր գրողներ էին իրենց ստաղծագործության բազմաթիվ հատկանիշներով, չափազանց տարբեր, բայց ազգի բազմազանությունը

⁴ Զրանտ Մաթևոսյան. Մաքուր, լուսավոր մի անկյուն։ Գրական թերթ, 22 հունվ. 1967թ.։

⁵ Զրանտ Մաթևոսյան. Դակոր Մնծուրու աշխարհը։ Գարուն, # 7, 1971, էջ 55։

⁶ Գրական թերթ, 12 մոյ. 1976։

նրանք էին միավորում և ամբողջացնում: Եվ չնայած այդ մեծ տարբերությանը սկսած ծննդավայրից ու ծագումնաբանությունից, վերջացրած իրենց ներկայացրած միջավայրի պատմական ճակատագրով, այնուամենայնիվ, ինչպես իսկական հայ Մաթևոսյանը վստահորեն արձանագրում է «ես մի քիչ նա եմ և նա մի քիչ ես»: Թեպետ Մաթևոսյանը այն վրեժի անմիջական հետևորդը չէր, ինչպես Գալշոյանը, Բայց Մաթևոսյանին Սուշեղի մեջ հատկապես դա էր դուր գալիս, որովհետև ինքն էլ ուժեղ մարդկային բնավորությունների երկրպագուն և իր ստեղծագործությամբ մարմնավորողն էր: Դրանով նրանք հարազատանում էին: Գալշոյանի վաղաժամ կորուստը Մաթևոսյանը Սևակից ու Մինասից հետո ճակատագրի երրորդ հարվածն է համարում, ու զարմանալի խորատեսությամբ ինչ-որ անբացատրելի համապատասխանություն է գտնում՝ երեքն էլ զոհվեցին 47: ամյա հասակում: Նա այն դանդաղ ժամանակների համար դա չափազանց քիչ է համարում. «Այդ տարիքին նոր միայն գրիչ բռնել են սովորում»: Մաթևոսյանը սա ընդգծում է շեշտելու համար, թե այս տաղանդավոր անհատները, ի հակադրություն սովորույթի, ինչքան բան են հասցրել անել ու միաժամանակ ուզում է ընդգծել՝ դեռ ինչքան բան կանեին: «Մեզանից նրա կարոտով խլվեց շիտակության, սիրո, գաղտնիքի, վրեժի, պատմության, ցասման, հուսահատության ու հույսի անտրոհելի կոփածոքը», - գրում է Մաթևոսյանը⁹:

Դրանտ Մաթևոսյանի կյանքում մեծ տեղ ուներ *Սարոյանը*: Իհարկե, ամերիկյան գրականության մեջ նրան ավելի Ֆոլկներն էր ձգում, և նրա հետ են համեմատում, սակայն սարոյանական միամիտ մաքրությունն ու հոգեբանական յուրահատուկ խորությունը անսահման հարազատ էին Մաթևոսյանին: Դայաստանում լինելով, Սարոյանն այնպես էր շրջապատվում հատուկ անձանցով, որ մեծագույն դժվարություն էր նրան մոտենալ: Սակայն հայ գրականության մեջ նա ձևականություններից իսպառ գերծ մարդը, առաջին հերթին Մաթևոսյանին էր նկատել և հայ գրականությունից խոսելիս անընդհատ նրան էր մատնացույց անում: Մաթևոսյանը երկու օր լինելով Սարոյանի հետ, նույնպես այն բնորոշ բաներն էր միայն հիշում, որ ուրիշները չէին էլ նկատի: Օրինակ, միասին ճամպարհորդելիս ինչն էր տպավորվել. «Բոլոր մեծերի մեջ լինելով, վերջապես ընտրեց ամենամեծին փոքրիկ Անուշին, որ հիացած, կլոր աչքերով իրեն էր նայում»: Այդտեղ Սարոյանը ինչ-որ նկատել էր ու հուզվել նա անպաշտպան է, ինչպես է նա ապրելու...¹⁰: Սարոյանի կյանքից նրա մեջբերումները բոլորը շատ դիպուկ են ու բնութագրական, Մաթևոսյանը գրողի, հոգեբանի իսկական հայացք ունի: Ինչպես իրեն հատուկ է, Մաթևոսյանը

⁹ Տես «Ավանգարդ», 17 հոկտ. 1980 թ.:

¹⁰ Դրանտ Մաթևոսյան, Սարոյանիության մեծ առաքյալը. Երեկոյան Երևան, 21 մայիսի 1981:

Սարոյանին ևս տեսնում էր ոչ այն սովորական պրիզմայում, ինչ ընդունված է, նա անպայման առանձնահատուկը, խորհրդապաշտականը պիտի նկատեր: Դե արի ու որոշիր՝ ինչու է Շվեյցերի, Նանսենի, Գանդիի, Թումանյանի կրտսեր եղբայրը համարում Սարոյանին: Ինչու՞ է համեմատության համար ընտրել հենց նրանց՝ ամենատարբեր ոլորտի մարդկանց: Իհարկե՝ երբ միտքը կա, թեկուզև որոշակի կողավորված, կարելի է և գուշակել սրանք բոլորը հումանիզմի բարձրագույն արժեքների կրողներ են, և դա է նրանց միավորում, նաև՝ Սարոյանի հետ: Մաթևոսյանը Սարոյանին ամբողջ խորությամբ էր տեսնում: Երբ ուրիշները նրա հռչակի հետևից էին գնում, Մաթևոսյանը, շատ գծերով նրան հարազատ լինելով, ընկալում էր Սարոյանի իրական մեծությունը. «Ինքը իր հռչակից մեծ է, և հռչակված ուրիշներից էլ մեծ է»:

Հրանտ Մաթևոսյանի զգայուն գրիչը չափազանց արդյունավետ էր հայ գործիչների կերպարներին անդրադառնալիս: Նա հիսունի չափ հողվածներ է տպագրել հայ և միջազգային գրական, հասարակական, մշակույթի, պետական գործիչների մասին, որոնք գրեթե բոլորն աչքի են ընկնում մոտեցման ինքնուրույնությամբ և նոր գծեր են բացահայտում այդ ճանաչված անձնավորությունների կենսագրության և խառնվածքի մեջ: Այստեղ մենք հանդիպում ենք Հակոբ Մնձուրուն, Ստեփան Ջորյանին, Գուրգեն Մահարուն, Մուշեղ Գալշոյանին, Անդրանիկ Շառուկյանին, Վահան Տերյանին, Հովհաննես Թումանյանին, Եղիշե Չարենցին, Հրաչյա Քոչարին, Սիլվա Կապուտիկյանին, Անահիտ Սահինյանին, Վարդգես Պետրոսյանին, Համո Սահյանին, Վահագն Դավթյանին, Վանո Սիրադեղյանին, Վազգեն Սարգսյանին, Վիլյամ Սարոյանին, զորավար Սնդրանիկին, Վասիլի Բելովին, Սուրեն Աղաբաբյանին, Հրանտ Թամրազյանին, Սինաս Ավետիսյանին, Վարուժան Վարդանյանին, Միեր Մկրտչյանին, Լյուդմիլա Մոտալովային, ամերիկահայ հեռուստաբեմադրիչ Սուրեն Բուրսալյանին, այլոց: Սա մի առանձին աշխարհ է՝ բաղադրված մտավորականության ընտրանու ընդգրկում արժանիքների և մաթևոսյանական գույների յուրահատուկ խտացմամբ, որն իր ամբողջության մեջ մի առանձին ուսումնասիրության նյութ կարող է դառնալ:

Կյանքի վերջին շրջանում Մաթևոսյանը հետաքրքիր անցում կատարեց հայ գրականության մեջ իր ընտրյալների շարքում: Սովորաբար ով գալիս է ամենամեծերից է սկսում: Մաթևոսյանն այդպիսին չէր, սկզբում նա մամրամասնորեն, մասնագիտաբար մոտենում էր այն հեղինակներին, որոնք այս կամ այն գծով հարազատ էին իրեն, ծայնակից, և նույնիսկ կարող էր նրանց գերազանցել իր տաղանդով, բայց ինքը հավասարապես խառնվում էր նրանց տարերքին և համտեղ մարմնավորվում: Վերջին շրջանում, երբ արդեն անվերապահ ճանաչված և խորապես ինքնահաստատված վաստակաշատ գրող էր, նա սկսեց իր

հոգեբանական խորության մեջ ընդգրկել առաջնահերթորեն մեր մեծագույն գրողներին՝ *Թումանյանին* և *Զարենցին*։ Իննսուհանգուցյակ տարեկան հասակում հայ ազգային ինքնության համար շրջապատը, ամենայն ուսանելին, օրինակ բերել նրանց։ 99-ին նա արդեն գրում էր. «Իմ ընթերցողը նրանք են, ովքեր նրանց վերջնական ճանապարհին պաշտել են, մեծարել ու մեծացրել Տերյանին, Թումանյանին, Զարենցին»¹⁴։ Մաթևոսյանը այդ շրջանում մի տեսակ ամփոփել էր իր գեղարվեստական գրականությունը, արձանագրելով իր մասնավոր թեմատիկայի բարձրացումը ըստ ամենայնի համամարդկային մակարդակի, և այստեղ է միայն, որ չափազանց հավասարակշիռ գրողը իրեն թույլ տվեց մտնել թումանյանական և չարենցյան հզոր աշխարհը։ Եվ սա միայն անձնականով չպետք է բացատրել։ 90-ականների կեսերից մեր ժողովրդի և նրա մտավորականության առջև արդեն ձևավորվել, ավարտուն ձևակերպվել էր նաև այն պատասխանատու և խոր իրադրության զգացողությունը, որ վաղ թե ուշ պետք է զգալ տար խորհրդային «անհոգ» ժամանակներից և անկախության խանդավառությունից հետո։ Արդեն եկել էր ժամանակը գիտակցելու ազգին այսպես ասած պահելու, նրա հավերժական ուղին ապահովելու մեծ պատասխանատվությունը, որի հոգեբանական (ցանկալի կլիներ նաև ինտելեկտուալ) մեծագույն պատասխանատվությունն ընկնում էր ազգի առաջատար մտավորականության վրա։ Այս իմաստով իրենց ժամանակ անկրկնելի էին Թումանյանն ու Զարենցը։ Վաղ անդրադարձներում եթե Թումանյանը Մաթևոսյանի համար գեղարվեստական բացարձակ մեծություն է, բանաստեղծական տաղանդի ու փիլիսոփայական խորության լավագույն օրինակ, ապա անկախության նախօրեին և դրանից հետո գրված հոգվածներում նրա մեջ, ի լրումն ամենի, տեսնում է լուսավորչին, հասարակական ու ազգային գործչին։ Այս շրջանում Մաթևոսյանը Զարենցի մեջ սրությունն ու իրեն պարտադրելու կարողությունն է ընդգծում։ Նույնիսկ կուսակցականությունը (լայն առումով)։ «Մենք պարտավոր ենք Զարենցորեն խստակեց, հստակ և խիզախ լինել ողջ իրականությունն այնպես ընդգրկելու, որ կուսակցական սրություն ունենա, և մեզ օրթոդոքսորեն կարողանանք պարտադրել այսօրվա իրականությունը»¹⁵։ Թվում է մաթևոսյանական չէ «օրթոդոքսորեն», «կուսակցականորեն» և այլն։ Այնինչ դա Զարենցին հասկանալուց է, նա ոչ թե այս անդրադարձում իր բնավորությունն է դնում, այլ խոսում է Զարենցի բնավորությամբ, փնտրելով, թե դրանից ինչ ունենք այսօր հրատապ

¹⁴ Դրանտ Մաթևոսյան։ Գրողը, ժամանակը, ընթերցողը։ Առավոտ, 13 հոկտ. 1999։

¹⁵ Դրանտ Մաթևոսյան, Մեր ուսուցիչը Զարենցն է լինելու։ «Գարուն», # 3, 1997, էջ 4

օրինակ վերցնելու, և ինչը կարող է իրական գործոն լինել այսօրվա համար: Ալկհայտ է. և դրանով ուշագրավ, որ չարենցյան պրոբլեմները Մաթևոսյանը տարածում է և *մեր ժամանակների* վրա.

Եվ քանի որ հասանք օրվա հրամայականներին, չենք կարող չանդրադառնալ Մաթևոսյանի կողմից մի ուշագրավ անդրադարձի, որը շատ հատկանշական է գրողի մտածողության ուշ շրջանի ուղղվածության համար: Դա դարասկզբի հայ պետական գործիչ *Արամայիս Երզնկյանի* կերպարին անդրադառնալու փաստն է: Այս գործի մեջ Մաթևոսյանը տեսնում է բոլոր տեսակի իրավիճակներում հանուն ժողովրդի գործելու, դրսևորվելու հնարավորություն գտնելու անչափ զնահատելի տաղանդը, հակասությունները թե՛ դրսում և թե՛ ներսում առանց պատճառաբանությունների ինչպիսին էլ դրանք լինեն, կարգավորել կարողանալու նախանձելի ունակությունը, բոլոր քաղաքական ուժերի հետ՝ հանուն ժողովրդի առանց հիշաչարության համագործակցելու պատրաստականությունը, ինչը նա պետական գործի համար չափազանց կարևոր հատկանիշ է համարում, որ այսօր չի տեսնում. «Նա կարողանում էր խաչված սրերն իջեցնել, անկապելիները կապակցել, հակառակ քնեռները մերծեցնել: Նրա այդ հատկությունը ավելի քան պետք էր իր ժամանակի Հայոց պատմության ամենաարտակարգ պահերին: Նա կուսակցության Լոնդոնի համագումար տարավ երեկվա թշնամական ուժերի միաբանությունը...»¹⁶. Բացառիկ քաղաքական կազմակերպվածություն և նպատակաուղղվածություն է դրսևորում Հրանտ Մաթևոսյանն այս շրջանում իր հարցադրումների մեջ: Երբ բոլորը շարք կանգնած զինվորների նման երդվում էին ֆիդայական շարժմանը ու ազատագրական պատերազմով, Մաթևոսյանը (Երզնկյանի անունից) մտածում էր. «Ցանկանում ենք լինել դարձյալ հզոր, անկախ, մեծ Հայաստան ծովից-ծով: Գուցե՞ թե, հը՞: Ինչպե՞ս, ինչո՞ւ, ու՞մ միջոցով, ո՞վ է մեզ օգնելու. ո՞վ է ցանկանում մեր հզորությունը, ինչու՞ է ցանկանում, ինչու՞ էր ցանկանալու»: Այսօր սրանք դարձյալ ամենաակտուալ հարցադրումներն են մնում: Եվ դրանք այնքան հմտությամբ են առաջադրված, որ իրենց մեջ սպառնիչ պատասխաններ են պարունակում. «Կազմեց «Ծիածան» խումբը, վճռական «ոչ» ասաց այդ ռոմանտիզմին ու ռոմանտիկներին, ովքեր նորօրյա երկաթե հզորությունների դեմ ոգեկոչել էին ուզում մեր հնօրյա այրուծի հզորությունը»: Ինչպես մեր ամենախորագետ պատմավիպասանները, Մաթևոսյանը Արամայիս Երզնկյանի կերպարը ընտրել է դիտավորյալ, նրա՝ ռոմանտիկ ազգայնականների հետ վեճի վերլուծությամբ արծագանքելով այսօրվա դրույթներին:

¹⁶ Այս և հարորդ մեջբերումները տես Հրանտ Մաթևոսյան, Դեմք, որ դարձել էր լեզենդ: Հայաստանի Հանրապետություն, 23 փետրվարի, 1999թ.

Սկսեցին, որ դեռ այն ժամանակ Մաթևոսյան-անհատի այս մտորումները այսօր բացարձակ արդիական են դարձել, և հավանաբար Մաթևոսյանը իր ոչ գրական քաղաքական գործունեությունը, որ կյանքում այնքան էլ չէր ստացվել ժամանկների անկառավարելիության պատճառով, վերապահում էր այս ճակատագրական ուղղությանը: «Տեսությունը տեսություն, բայց կյանքը հետո շատերի առջև էր պատի նման կանգնելու, և դա շատ ավելի իրենց լայնախոհության պակասի, այսպես ասած սկզբունքային նեղմտության պատճառով»: Պարզ է, որ այսօրը նկատի ունի:

Արամայիս Երզնկյանի կերպարին ևս նա անդրադառնում էր ոչ թե առաջին հայացքից թվացող նրա հաղպատցի լինելու առիթով (դարձյալ շատ հնացած «գյուղական հարազատության» մոտիվն է գործում), այլ կարգավորման հրատապ անհրաժեշտություն զգացող ժամանակի թելադրանքով: Արդյո՞ք պետական այդ կարգի գործիչների մասին իր անավարտ, շատերի կողմից չհասկացված ու չարձագանքված իդեալները նաև նկատի չունի Մաթևոսյանը ընդգծելով. «Անդրկովկասյան սեյմի և կառավարության անդամ (աշխատանքի միմիստր), հայոց ազգային խորհրդի անդամ Արամայիս Երզնկյանը չիրավիրվեց Հայաստանի առաջին հանրապետության հիմնականում դաշնակցական կառավարություն, ինչպես նաև Խորհրդային Հայաստանի ղեկավար մարմին հեղկոմ»: Սակայն Մաթևոսյանը լի է փիլիսոփայական լավատեսությամբ, հիշատակելով Երզնկյանի հետագա գործունեությունը համեստ, ոչ ճակատային, բայց ազգային շինարարության մնայուն բնագավառում: Սյսպիսի խաղաղարար և ստեղծագործ աշխատանքն է Հրանտ Մաթևոսյանի իդեալը ազգային գործչի համար:

Հրանտ Մաթևոսյանի դիտողությունները գրողների մասին միշտ փնտրված ու ամենաընթերցվողներն են: Նրա անդրադարձները հայ գործիչներին խմբագիրների կողմից միշտ առանձին հաճույքով են ընդունվել ու տեղադրվել առաջին էջերում: Սրանք գրականագիտական վերլուծություններ, գրախոսություններ չեն, սրանք բոլորը հոգեբանական վերլուծություններ են, մարդկային գրույցներ: Իսկ վերջին շրջանում նաև հատկապես ընտրված, շեշտադրված, մեթոդիկ և նպատակային կերպով կառուցված օրինակներ՝ ցույց տվող մեծ գրողի մտածողության իրական ուղղվածությունը: